


Odisea riba Lama



Sra. Maria Ras, un historiado y un cantante popular bon conoci na Aruba kende a nace na San Nicolas, a batisa na Savaneta y cu lasonan familiar na Savaneta, ta biba na Bottomhillweg 17 na San Nicolas. Den un entrevista a tene cu Sr. Jose Wever, e ultimo aki ta conta cu tabata na aña 1958 cu tres hoben Arubiano a sali cu un boto di bela y dos a regresa. E aña ey nan a marca historia mundial. Sra. Maria tin e relato graba riba un audio cassette. Pa un detaye completo por lesa e storia aki den e buki “*Perdi riba Lama*” skirbi pa Sra. Yolanda Croes na 1999.

E tempo ey no tabata conoci na mundo, un otro odisea di hende cu a perde riba lama cu a keda e cantidad di 30 dia, anto pa colmo sin cuminda y awa, prome cu nan a pone pia riba tera bek.

Maria Ras ta conta di un otro tragedia cu a sosode riba lama na e mesun aña 1958. Loke e ta conta a resulta for di un combersacion cu el a sostene cu un di e personanan cu a sobreviví. Sr. Ernesto Wouters, miho conoci como Nene, e tempo ey tabatin 17 aña di edad y ta relata lo siguiente: Nos a Sali pa 10:30 di anochi for di waf di Cura Cabay, cu un tripulacion di cuatro persona piscado abordo di e boto di bela “Ata Mi” cu e intencion di bay pisca na Baho. Tabata Ernesto Marchena, Jesus del Pino, Guillermo Flanders y mi persona. Tabata riba un diabierna y e lama tabata basta bruto. Saliendo for di Cura Cabay, mi tabata stuur e boto y ora nos a yega pariba di Easo Club, Ernesto a tuma over y mi a bay drumi. E momento ey mi a sinti hopi cansa door cu Guillermo cu mi a bay pisca e dia prome tambe. Prome cu Ernesto a tuma over, el a puntra mi cual direccion nos mester tuma pa yega Baho. Mi a contest’e cu despues di Lavadero, nos ta coy rumbo bay directo pazuid. Esey tabata e ultimo biaha tambe cu mi a papia cu ne.

Mi no por corda con hopi mi a drumi, pero loke a spierta mi tabata awa, debi cu e boto a cuminsa yena cu awa y bou dek tabata yen di awa. Ora mi a spierta mi a haya Guillermo para patras cu un cara preocupa y el a grita cu e boto ta zink. Mi a bis'e pa bula na awa y ami a sigui'e. E otronan tabata den awa caba. Jesus ta conta despues, cu e tambe tabata drumi y ora el a sinti e boto ta yenando, el a core bay dilanti pa coy un salbabida. El a bisa nos cu tabatin salbabida mara na e pia di e master,

pero ora el a sinti cu e balasternan a bolter, e tambe a bula na awa. Jesus ta conta cu e cu Ernesto ta e promenan cu a bula na awa.

E tragedia aki a sosode riba Cebes y e ora ey tabata mas o menos l'or di marduga y mi ta kere cu e boto mester a habri, aunke e boto no tabata bieu y tabata bon cuida. Nos tur cuatro tabata den awa y prome cos cu mi a haci, tabata kita tur mi paña y mi tabata mira con e boto a sigui zink y mi a mira e master desapare. Loke mi ta corda tambe ta cu mi a tende Ernesto tabata pidi pa yud'e cu e cabuya cu tabata troce rond di su pia y mi a bay purba yud'e. Mi a cuminsa landa den su direccion, pero Jesus a grita mi pa no bay "pasobra si e homber ey gara bo, bo ta hoga hunto cu ne". Door di esey mi no a sigui. Despues di esey, nos tur a perde otro y mas despues mi a mira Guillermo riba e luik cual ta e unico cu a resta di e boto.

Despues di basta rato cu mi tabata den awa, mi a bin topa cu Jesus y nos a keda hunto. Despues mi a mira un luz cu tabata cende paga y mi a bisa Jesus pa prepara pa grita pasobra tin un barco ta bini y ainda mi tabata kere cu ta na Baho nos tabata. Ta despues my a haya sa cu e rumbo a cambia. Nos a sigui mantne riba e luz, keriendo cu tabata di un barco pero tabata luz di faro. Direpiante Jesus a bisa mi cu awo si e ta bay laga mi, e no tabata por mas, pasobra e tabata morto cansa. Mi a recommend'e pa kita tur su paña, cual el a haci tambe. Asina nos a sigui dirigi nos mes riba e luz di faro, pero tabatin hopi coriente cual tabata hiba nos den direccion nort. Mas nos tabata yegando tera y segun e olanan grandi tabata bin, nos tabata sak bou awa pa laga nan pasa. Mi a

bisa Jesus pa si acaso e sinti e prome piedra pa e gara esaki, pasobra lama banda di costa tin rif y lama por suta nos.

Asina nos a sigui y cada biaha cu nos bay bou awa y nos lanta, nos tabata grtia otro te cu porfin nos por a fula tera, cual tabata exactamente na Boca di Tabla. Esey tabata nos suerte cu nos a bay riba e rif. Tabata un ola grandi cu a bin cu nos y tira nos na unda cu nos por a para unda e awa tabata mas o menos tres pia hundo. Ora nos a purba, mi a cay bek y mi a cuminsa gatia subi tera y ya dia tabata kibrando. Mi ta calcula cu tabata mas o menos 4'or di marduga. Nos a keda descansa riba tera tres pa cuatro ora, sperando riba nos otro compañeronan. Ora nos a ripara cu

nan no ta bin, nos a dicidi di cana bay pa e porta di Lago, pero nos no tabatin paña bisti. Jesus a bisa mi cu ta miho nos bay hospital di Lago. Asina nos a sigui cana riba e skerpinan. Ora nos a yega panort di hospital, nos a haya un carton grandi y nos a parti'e den dos cu nos por a cubri nos curpa cu ne. Ora nos a yega hospital, nos a grita "auxilio". Mesora a bin dos enfermero y nos a bisa nan cu nos kier paña. Nan a bin cu laken cu nos por a tapa nos curpa.

Den hospital nos a splica nan kico a pasa y nan a yama autoridad pa nos splica kico a pasa, cuanto hende nos tabata y kendenan a yega tera. Ey nos mester a keda pa descansa den e di tres piso. Polis a bini y despues nan a bay busca paña na cas pa nos. Despues nan a hiba nos na warda di polis unda nos mester a bolbe duna un declaracion. Siguiementemente, nan a hiba nos cas y na mi cas nan a duna informacion robes, esta cu nan no a haya mi. Mi rumannan a sali pa bay busca mi y nan a haya Guillermo morto, pega riba rif na costa. E tabata cu tur su paña bisti y Ernesto si nan no a haya. Nada di e boto a bin tera. Lago a manda tugboat bay busca, pero nan no a topa cu nada. Nene ta conta cu ta ora el a yega tera, el a mira di berdad el a scapa. Tabata mescos cu ta for di un soño el a lanta. El a sigui bay lama, pero nunca mas den ora di anochi, ni tampoco cu boto di bela.

Asina tin tambe otronan cu a pasa den un tragedia cu a perde cu boto, entre otro: Juan Pedro Thijsen y Mario Thijsen den e boto di 14 pia

“Coromoto” na maart 1957. Na aña 1994 Chimbo, yiu di Juan Pedro, su so a bay pisca y tambe a perde ora motor a dañá. Ami mes tin un ruman homber cu tabata pisca pa placer, Antolin Kock, cu a perde na varios ocasion riba lama y semper door di motor cu ta dañá. E ultimo tragedia tabata dia cu el a bay pisca cu Pedro Larez, motor a dañá, y a perde pa basta dia y ser encontra banda di Panama. Nan tabatin suerte cu mi ruman semper ta hiba hopi cuminda y awa cu nan por a sobreviví.

Dufi Kock

Escritor y Historiado

Savaneta 125-F

Tel: 584-1201

Cel: 592-9417

dufikock@gmail.com

Lid in de Orde van Oranje Nassau 2006